

S-chüsa – Cuvits 2009

Stimats abitants da Sent, stimats giasts, chars scolars ed uffants

L'unic chi resta adüna constant es il müdamaint, ün fat chi's sto simplamaing acceptar ed integrar aint in nos schema da pensar. I nun es mai la dumonda scha alch as müda mo dimpersè be adüna **co** chi's müda. E qua cumainza la lavur da las instanzas politicas in tuot ils livels.

Üna visiun sül nivel cumünal es daspö lönych da posizunar Sent sco **il** lö da cultura in EB. Pass in quella direcziun sun stats, sper ils concerts baincuntschaints, e'l simposium da sculpturas a Sur En, - la fundaziun da La Grotta da cultura chi spordscha ün fich vast program da cultura da tuot gener, la modernisaziun dal palc in chasa da scoula chi dà uossa la pussibilità per rapreschantaziuns da gruppas ed orchesters laics mo eir professiunals, la galleria Sperone chi riv'üna porta eir a l'art internaziunal e'l parkin da Not dal Mot chi ha pudü gnir declerà sco zona d'art a Sent e's verificchar sco grond'attracziun per nos cumün.

Per consolidar l'attracziun dal cumün mo a l'istess mumaint eir da la regiun s'haja partecipà vi da l'augmaint dal chapital d'aczias da las Pendicularas Motta Naluns e dat uschea la pussibilità dad eriger üna nouva pendiculara moderna. Eir in quella categoria lessa metter ils sforzs per la renovaziun e l'ingrondimaint da l'ospidal mo eir ün per robas da taimpra plü locala sco las punts in Val Sinestra o eir las eivnas da god a Sur En e lura natüralmaing sco high-light la piazza da sport da blers bramada daspö blers ons.

Da, sco ch'eu pens, grond'importanza per l'agricultura mo eir per l'economia es stat la realisaziun dal proget da la sauaziun chi cuntinuarà quist on culla 2. etappa e chi terminerà eir plü co facil la grond'ouvra da la miglioraziun generala cumanzada avant 25 ons.

Per finir less eu amo manzunar l'introducziun da tempo 30 chi spordscha a la glied sün via daplü sgürezza e la commembranza ill'Allianza da las Alps, ün'organisaziun chi'ns maina contact cun blers cumüns in tuot ils pajais da las Alps chi stan o sun stats davant las istessas sfidas da l'avegnir sco no. Lur experienza e savair e per part lur sustegn finanziel sun per no da gronda valur.

Pled da cuvits 2009

Stimats preschaints.....

Minchün as fa da temp in temp impissamaints sur da l'avegnir, saja quel tuot privat o quel da la famiglia o eir dal cumün, dal pajais o dafatta dal muond.

I vain dit, schi's taidla las prognosas per l'economia mundiala chi nu guarda oura bain, i's discuorra da crisa da finanzas e da recessiun.

Diversas pütts chi vaivan tgnü blers ons franc e ferm nos sistem economic nu paran dad esser plü stabilas e la fiduzcha ch'ellas tegnan eir vain vi plü pitschna. La consequenza es chi's vezza nair. – L'avegnir fa plü temma co cuvaida, i's derasa vi e plü ün'atmosfera deprimida.

In quist mumaint as regorda l'optimist als cuntschaints plets da Wilhelm Busch:

Erstes kommt es anders und zweitens als man denkt..., ed el viva inavant sainza gronds pissers.

Eir sch'eu n'ha vaira bleras simpatias per optimists e'm dombr normalmaing eir pro quels esa ün pensar ün pa massa liger. Las nüvlas chi's fuorman sül tschel economic esa da tour plü serius.

Per chi gnia oter co chi's pensa, co cha'ls prognosticers pensan, nu's das-cha viver be pel muond aint, as stoja as sfadiar activmaing per gnir sü dal „bass“.

Il motto stu vess esser: „uossa pür inandret!“ O sco chi disch il nouv president american Barak Obama cun seis cuntschaint slogan: „*Yes we can*“, schi no savain....., no rivain...

Üna ditte intant fingià gnüda citada x jadas, chi ha persvas a milliuns Americans e derasa inavant ün optimissem san chi güda bain inavant in temps na plü uschè simpels.

Ün chapital fich precius, stimats preschaints, chi'ns es intanta restà, malgrà tuot las crisas, es nossa val, l'Engiadina Bassa,

l'ambiain in tuot sias facettas e variaziuns. Quel chapital fuorma la plü ferma e sgüra pütta per nos avegnir. La val spordscha bleras pussibilitats per lavurar mo eir per viver cuntaint e star bain, cun oters plets, nos spazi da viver es ün s-chazi enorm chi nu's po predschar avuonda e chi po güdar inavant amo bler meglder co tuot ils plets da spranza per l'avegnir. Ün s-chazi dimena chi'd es bler massa precius per til laschar aint illa chaista e nu dar bada e per la paja tscherchar la furtüna in oters lös.

Id es da tschella vart però ün s-chazi dad uschè gronda valor chi nu's po nüzziar be imponderadamaing, sainza reflectar e sainza il respet ch'el pretenda – be ün s-chazi nüzzià persistentamaing po avair success.

Chars Sentiners, scha no train a nüz eir in avegnir las pussibilitats chi'ns sun dattas da möd ch'eir prosmas generaziuns pon amo viver quia schi vaina bunas perspectivas e las nüvlas nairas chi paran da's muossar a l'orizont nu's manglan far uschè gronda temma.